

御纂傷寒心法要訣卷之二

表熱裏熱陰熱陽熱

發熱無時熱翕翕炊籠騰越熱蒸蒸表熱尿白裏
熱赤外需麻桂內涼承燥乾煩渴爲陽熱厥利外
熱屬陰經陽熱宜清白虎輩陰熱四逆與白通



註發熱無時熱翕翕謂發熱無休止之時若合

羽外覆之表熱也炊籠騰越熱蒸蒸謂發熱
如炊籠蒸蒸內越之裏熱也表熱熱不在裏
故尿白也裏熱故尿赤也外需麻桂謂表熱

無汗宜麻黃湯有汗宜桂枝湯內涼承謂裏熱輕者宜涼膈散重者宜三承氣湯發熱兼口燥舌乾煩渴者爲陽經之熱也發熱兼厥冷下利清穀者屬陰經之熱也陽熱宜清白虎解毒輩也陰熱宜溫四逆白通湯也

翕翕蒸蒸發熱俱有汗二證相類若以翕翕之表熱誤爲蒸蒸之裏熱下之則逆若以蒸蒸裏熱誤爲翕翕表熱汗之轉傷翕翕之汗熱雖同蒸蒸而捫之自溫不似蒸蒸之汗熱

捫之自有熱氣透手也其間或有疑似難辨則又當審小便之白赤舌胎之潤燥自可決也

惡寒背惡寒辨

惡寒表裏陰陽辨發熱有汗表爲虛發熱無汗表實證實以麻黃虛桂枝無熱惡寒發陰裏桂枝加附頗相宜背寒口和陰附子口燥渴陽白虎需

註惡寒一證有表裏陰陽之辨發熱惡寒發於陽表也有汗宜桂枝湯無汗宜麻黃湯無熱

惡寒發於陰裏也有汗宜桂枝加附子湯無
汗宜麻黃附子細辛湯背惡寒口和謂口中
不燥而和也陰謂屬少陰也宜附子湯背惡
寒口燥渴謂口中燥而渴也陽謂屬陽明也
宜白虎加入參湯
陰陽二經惡寒雖同其身有熱無熱則異也
一則汗之一則溫之少陰陽明之背惡寒雖
同其口中和口中不和則異也一則溫之一
則清之惡寒雖屬輕微之證仲景立法可辨

他可類推矣

惡風

風寒相因相離少三陽俱有惡寒風惡風屬陽法
從表三陰惡寒無惡風

註風寒二者大率多相因而少相離有寒時不

皆無風有風時不皆無寒故三陽俱有惡寒
惡風同見也惡風與惡寒均表病也法當從
表然風屬陽寒屬陰故三陰經證有惡寒而
無惡風也

頭痛

三陽頭痛身皆熱無熱吐沫厥陰經不便尿紅當議下尿白猶屬表未清

註三陽謂太陽陽明少陽也頭痛身皆熱謂三陽頭痛身皆熱也三陽經頭痛法當從三陽治也厥陰頭痛則多厥而無熱嘔吐涎沫是厥陰挾寒邪上逆也宜吳茱萸湯溫而降之三陽頭痛若不大便小便紅赤爲裏實熱法當議下宜承氣湯若小便清白卽不大便爲

裏熱未實表尚未清法當先從表治也三陰經無頭痛惟厥陰有頭痛以其脈與督脈上會於巔也三陰經無發熱厥陰少陰亦有發熱謂之反發熱以其藏有相火陰盛格陽於外也

項強

項背几几強太陽脈浮無汗葛根湯有汗桂枝添葛入脈沉括萋挂枝方結胸強項如柔痙大陷胸丸下必康但見少陽休汗下柴胡去半入萋良

註項强大陽病也項背强太陽陽明病也凡凡
拘强而甚之貌也脈浮屬二陽之表脈也若
無汗是從傷寒傳來宜葛根湯有汗是從中
風傳來宜桂枝加葛根湯脈沉謂邪已入胸
裏也宜栝蒌桂枝湯結胸謂結胸病也項强
如柔痙謂項强背反張有汗如柔痙之狀也
宜大陷胸丸但見少陽謂太陽少陽併病之
項强休汗下謂邪入少陽不可汗下也宜小
柴胡湯去半夏加栝蒌主之良好也栝蒌桂

枝湯方在金匱要畧

身痛

身痛未汗表實證汗後身疼屬表虛桂加生薑芍
芍藥尺遲血少建中者少陰沉厥附子治厥陰汗
利四逆醫風濕盡痛難轉側掣引煩疼桂附宜

註身痛未汗屬表實證宜麻黃湯汗後身疼屬

表虛證宜桂枝新加湯即桂枝湯倍生薑芍
藥加人參也曰桂加即桂枝湯加此也尺遲
血少建中者謂身痛尺中脈遲是血少營氣

不足也雖未經汗不可發汗宜建中湯加黃
者以補營血也少陰謂身痛見少陰沉脈四
肢厥冷也附子治謂宜附子湯治也厥陰謂
身痛見厥陰厥逆汗出不止下利清穀也四
逆醫謂以四逆湯醫也風濕謂風濕身痛也
盡痛難轉側是濕則令人一身盡痛不能轉
側掣引煩疼是風則令人筋脈牽引煩疼不
寧也桂附宜謂宜以桂枝附子湯也
煩躁不眠懊懣

躁身不靜煩心擾不躁難眠作熱觀懊懣煩甚無
冷病惟躁陰陽表裏看諸煩無論三法後便軟梔
竹等湯煎便軟白虎三承氣躁同陰見便屬寒

註身為熱動而不安謂之躁心為熱擾而不寧
謂之煩煩則擾於內躁則動於外故有心煩
而無身煩有身躁而無心躁也大抵煩屬陽
躁屬陰若懊懣心中反覆顛倒煩不得眠不
與躁同凡者皆無冷病當作熱觀也惟躁則
不然當分表裏陰陽取治故太陽有不汗出

而煩躁謂之在表大青龍證也陽明有心下
鞭之煩躁謂之在陽白虎湯證也三陰有吐
利手足厥之煩躁謂之在陰四逆輩證也諸
煩謂煩不眠懊懣也無論三法後謂不論已
經未經汗吐下三法之前後也但大便不鞭
者以竹葉石膏溫膽梔子豉等湯主治可也
便鞭者量其熱之深淺以白虎三承氣湯主
治可也躁同陰見謂躁同三陰證見便屬陰
寒之躁宜四逆理中吳茱萸湯主治可也

自汗頭汗

自汗熱越多急下更兼熱利不休凶頭汗熱蒸不
得越黃濕水火血皆成

註自汗在太陽謂之風邪桂枝湯證也在陽明

謂之熱越白虎湯證也若大熱蒸蒸汗出過
多則宜調胃承氣湯急下其熱救其津也若
更兼發熱下利不休內外兩脫故凶也頭汗
出劑頸而還則為熱不得外越上蒸於首也
或因黃鬱未發或因濕家誤下或因水結胸

蒸或因火劫熱迫或因陽明蓄血或因熱入血室皆令成之則當分門施治可也

手足汗

手足澼澼然汗出便鞭尿利本當攻寒中汗冷尿不利攻之固瘕瀉澄清

註胃主四肢爲津液之主今熱聚於胃蒸其津液傍達於四肢故手足澼澼然汗出且小便自利胃中津液必乾大便必鞭本當攻也若中寒胃陽土虛脾不約束津液橫溢四肢猶

如陰盛淫雨滂沱故汗出而冷也陽虛失運中寒不化故小便不利也今雖便鞭而手足汗出非爲熱越者比慎不可攻攻之必變生固瘕泄瀉澄清不止也

潮熱時熱

午後一發爲潮熱無休發熱汗蒸蒸時熱自汗無裏證先時與藥桂枝稱

註潮熱陽明府證也陽明王於申酉故潮熱發於午後如潮信之不失因名之曰潮熱可下

之證也無休發熱汗蒸蒸謂發熱無休止之
時熱氣透手漆漆有汗名曰蒸蒸發熱亦屬
陽明內實可下之證也時熱自汗者謂發熱
時輕時重而有自汗也似潮熱而次數似蒸
蒸而休止潮熱蒸蒸之熱則必兼有可下之
證時熱時止之熱則必不兼可下之證故曰
無裏證也因其無裏證熱而有汗知風邪留
連在表不已故用桂枝主治然必先其發熱
汗出之時與桂枝湯也蓋桂枝不為時熱自

汗者設而為時熱自汗有表無裏證者設也
此處重在無裏證非謂凡有時熱自汗皆可
服桂枝湯也

譫語鄭聲

譫語為實聲長壯亂言無次數更端鄭聲為虛音
短細頻言重復更呢喃同陽經見均屬熱同陰經
見總為寒陽無可攻當清解陰不能溫清補痊

註言語心主之也心氣實熱而神有餘則發為

譫語譫語為實故聲長而壯亂言無次數

更端也心氣虛熱而神不足則發爲鄭聲鄭聲爲虛故音短而細只將一言重復呢喃也蓋神有餘則能機變而亂言神不足則無機變而祇守一聲也凡譫語鄭聲與陽經同見者均屬熱證可以攻之與陰經同見者總爲寒證可以溫之若雖與陽經同見而無可攻之證不可攻之當清解也與陰經同見而無可溫之證不可溫之當清補也

渴證

三法傷津胃燥乾陽往乘陰渴亦然渴欲飲水少與莫使停留飲病干太陽五苓尿不利陽明白虎飲連連少陽證具心煩渴小柴去半粉加添
註渴病多因或汗或吐或下三法傷其津液致令胃中乾燥故引飲也陽邪往乘三陰太陰則噤乾少陰則口燥厥陰則消渴渴在三陰陽邪亦屬熱傷津液故曰渴亦然也三陰之渴治法詳於三陰經內凡渴欲飲水者當少少與之以滋胃乾胃和則愈若恣意與飲之

不但渴不能愈致水停留為病也太陽之渴用五苓散者以水停下焦小便不利故也陽明之渴用白虎者以胃熱飲水連連不已也少陽寒熱往來等證已具心煩渴者用小柴胡湯以和解去半夏以避燥加花粉以生津液也

舌胎

舌心外候木澤紅紅深赤色熱為輕外紅內紫為熱重滑白寒表少陽經沉遲細緊藏寒結乾薄氣

液兩虛空黃黑胎潤裏熱淺焦乾刺裂熱深明黑滑若與三陰見水來尅火百無生

註舌者心之外候色應紅澤為無病也若初感

內外紅深則為有熱外紅內紫則為熱甚舌

胎滑白則為表寒其胎漸厚則為傳少陽經

也熱者宜辛涼汗之寒者宜辛溫汗之在少

陽者為胸中有寒丹田有熱宜小柴胡湯兩

解之胸中指表也淺也丹田指裏也深也非

直指胸中丹田謂半裏之熱未成半表之寒

猶在故舌白一證有寒有熱也若其胎滑厚
與陰證脈同見乃藏虛寒結以理中加枳實
溫而開之若其胎乾薄與陽證同見乃氣虛
液竭以白虎加入參清而補之若白胎漸變
黃色此為去表入裏其熱尚淺表不罷者宜
三黃石膏湯已入裏者涼膈散如焦乾黑色
或芒刺裂紋此為裏熱已深宜梔子金花湯
兼滿痛者大承氣湯紅火色也黑水色也與
三陽證見為熱極反兼勝已之化清之下之

尚可治也若與三陰證見則為水來尅火百
無一生治者以生薑擦之其黑色稍退急用
附子理中四逆輩救之可生

胸脇滿痛

邪氣傳裏必先胸由胸及脇少陽經太陽脈浮惟
胸滿過經不解有陽明乾嘔潮熱胸脇滿大柴加
硝兩解行心腹引脇鞅滿痛乾嘔屎秘十棗攻
註邪氣傳裏必先自胸若脈浮惟胸滿而不及
脇者仍屬太陽表分也宜麻黃湯因胸及脇

而皆滿者屬少陽經也宜小柴胡湯若十餘
日不解而胸脇滿兼乾嘔潮熱者是少陽兼
有陽明也宜大柴胡湯加芒消兩解之若表
已解心下及腹引脇滿鞅而痛乾嘔小便不
利者是停飲內實也宜十棗湯攻之

嘔證

嘔病因何屬少陽表入裏拒故為殃太陽之嘔表
不解食穀欲嘔在胃陽太陰有吐而無嘔厥陰涎
沫吐涎長少陰嘔利有水氣飲嘔相因是水鄉

註嘔病諸經皆有因何屬少陽也因表邪入裏

裏氣拒格上逆作嘔故為殃屬少陽也宜小
柴胡湯心下鞅而煩或不大便宜大柴胡湯
表不解之嘔屬太陽也宜柴桂湯食穀欲嘔
屬胃陽胃陽陽明也屬中寒宜吳茱萸湯得
湯更嘔屬表熱宜葛根加半夏湯嘔吐涎沫
或嘔吐涎屬厥陰也宜吳茱萸湯吐涎者宜
烏梅丸嘔而下利是有水氣屬少陰也宜真
武湯飲而嘔嘔而飲飲嘔相因不已是停水

也宜五苓散

往來寒熱如瘧寒熱

往來寒熱少陽證寒熱相因小柴胡如瘧寒熱三

五發太陽麻桂等湯除

註寒而熱熱而寒寒熱相因不已故名曰往來

寒熱為少陽主證宜小柴胡湯寒熱而有作

止之常一日一次或隔日一次謂之瘧屬雜

病也寒熱而無作止之常日三五發謂之如

瘧屬太陽經未盡之表邪也宜麻桂各半湯

若熱多寒少宜桂枝二越婢一湯若有汗宜

桂枝二麻黃一湯若無汗亦宜麻桂各半湯

此皆治太陽未盡之微邪法也

目眩耳聾

少陽目眩神自正諸逆昏亂不能生重暈耳聾濕

溫汗不語面色變身青

註目眩者目黑不明也耳聾者耳無所聞也皆

少陽經主證非死候也其目之明其耳之聰

神自完整若因三法失宜致諸變逆壞證目

眩而神昏言亂乃神散氣脫之候故曰不能
生也若因誤發濕溫家汗而不能言語耳聾
無聞身青面色變者名曰重暈亦死證也

腹滿痛

腹滿時痛不足證腹滿大痛有餘名誤下邪陷太
陰裏汗熱便鞭轉陽明

註 腹滿時痛為不足桂枝加芍藥湯不愈用理
中湯腹滿大痛為有餘桂枝加大黃湯此皆
誤下邪陷太陰之裏證也若潮熱自汗大便

鞭則為太陰之邪轉屬陽明也宜大承氣湯
吐證

中寒吐食不能食不渴而厥吐寒虛得食吐渴火
為逆飲吐相因水病居

註 中寒吐食謂中寒吐食不能食也凡不渴而

厥吐是寒虛吐也宜理中吳茱萸蕪輩凡渴而

得食即吐是火吐也熱實宜黃連解毒湯熱

虛宜乾薑黃連黃芩湯或竹葉石膏湯渴而

飲飲而吐吐而復渴水逆病也宜五苓散

熱利寒利

熱利尿紅渴黏穢寒利澄清小便白理中不應宜
固澁仍然不應利之瘥

註 自利不渴者屬太陰寒也下利欲飲水者以

有熱故也此以渴辨寒熱也小便黃赤穢氣

稠黏者皆熱利也小便清白澄徹清穀皆寒

利也熱利有表證輕者升麻葛根湯重者葛

根湯汗之有裏證者量以三承氣湯下之無

表裏證輕者宜黃芩湯重者宜葛根黃連黃

芩湯清之寒利宜理中湯溫而補之若服理

中湯不應者此屬下焦滑脫宜赤石脂禹餘

糧湯固澁仍然不應此為清濁不分水走大

腸宜五苓散或豬苓湯利之可瘥也

但欲寐

行陰嗜卧無表裏呼醒復睡不須驚風溫脈浮熱

汗出多眠身重息鼾鳴

註 行陰欲寐嗜卧少陰證也若欲寐嗜卧無表

裏證身和脈小知己解也然解後之睡呼之

則醒醒而又睡是陰氣來復非陰盛困陽不
須驚也風溫亦欲寐多眠則有脈浮發熱汗
出身重鼻息鼾鳴之別也

陰陽咽痛

咽痛乾腫為陽熱不乾不腫屬陰寒陽用甘桔等
湯治陰用甘桔附薑攢

註咽痛一證寒熱皆有咽乾腫痛為三陽熱證
宜甘桔半夏苦酒豬膚等湯調治不乾不腫
而痛為三陰寒證宜四逆湯加桔梗主治也

氣上衝

氣撞吐虺厥陰本無虺陽表桂枝湯少腹急引燒
視散衝喉難息瓜蒂良

註氣撞吐虺謂厥陰本證也無虺謂氣撞不吐

虺乃邪猶在陽表也宜桂枝湯少腹急引謂
氣上衝更少腹引陰急痛乃陰陽易病也宜
燒視散衝喉難息謂氣上衝喉胸滿難以布
息乃寒實在胸也宜瓜蒂散

飢不欲食

饑不欲食吐衄厥下後不食屬陽明懊懷頭汗梔
子豉厥繫心煩邪在胸

註饑不欲食吐衄厥謂厥陰本證也下後饑不
能食屬陽明也陽明病則懊懷心中煩甚頭
上汗出是熱在胃中宜梔子豉湯涌之厥陰
病則吐衄厥逆脈微今不微而緊更心煩者
非寒虛邪是寒實邪而在胸中宜瓜蒂散吐
之

手足厥逆

太陰手足溫無厥少陰厥冷不能溫厥陰寒厥分
微甚熱厥相因辨淺深

註太陰經無厥逆而有手足自溫少陰經有寒
厥而無熱厥厥陰經有寒熱二厥寒厥者祇
寒而不熱也熱厥者由熱而厥由厥而熱熱
厥相因無休歇也當辨陰陽淺深以當歸四
逆承氣等湯施治可也詳厥陰篇

少腹滿痛

少腹滿而按之痛厥逆尿白冷膀胱不厥血蓄小

便利小便不利水為殃

註

少腹滿按之痛若四肢厥冷小便清白者是冷結膀胱宜當歸四逆加吳茱萸生薑湯不厥冷小便自利者是血蓄膀胱宜挑仁承氣湯小便不利者是水蓄膀胱宜五苓散若大小便不利者是水熱蓄結宜八正散

神昏狂亂蓄血發狂

神昏胃熱重陽狂三黃三承白解湯蓄血發狂小便利少腹鞭痛屬太陽陽明蓄血大便黑其人如

狂而喜忘挑仁承氣抵當治須識作汗奄然狂

註

神昏胃熱謂神昏是胃經熱極乘心也重陽狂謂熱入於陽則狂亂也三黃謂三黃石膏湯治神昏狂亂表實無汗者也三承謂三承氣湯治神昏狂亂裏實不便者也白解湯謂白虎解毒湯治神昏狂亂無表裏證而熱極者也太陽蓄血發狂則少腹鞭痛小便自利若小便不利是水熱蓄也非血蓄也陽明血蓄如狂則喜忘大便黑若大便不黑是熱極

也非血蓄也蓄血輕者挑仁承氣湯重者抵當湯擇而用之可也然發狂證亦有陽盛陰虛之人作汗將解之時奄然發狂澀然汗出而解者當須識之不可以藥也

循衣摸床

循衣摸床有二因太陽火劫熱傷陰小便利生不利死陽明熱極熱彌深皆緣三法失成壞脈實堪下弱難禁虛實陰陽難辨處獨參六味可回春

註循衣摸床危惡之證也一因太陽火劫取汗

致陽盛傷陰陰若未竭則小便利多生陰若已竭則小便難多死一因陽明熱極汗吐下三法失宜致成壞證其熱彌深脈實者堪下則可治脈弱者不堪下則難治此已成危惡壞證往往陰陽虛實醫莫能辨無下手處當以大劑獨參六味乾生地黃湯時時與之每獲生也

太陽陽邪停飲

太陽陽邪有水逆消渴發熱汗出煩小便不利水

入吐衄浮而數五苓攢

註太陽陽邪有水逆消渴之病謂太陽中風有渴欲飲水水入卽吐者名曰水逆飲水多而小便少者名曰消渴發熱汗出風邪也煩熱也小便不利水入則吐飲停也浮數風熱衄也均宜五苓散多服煖水令微汗出外解太陽內利停水則愈若不能飲煖水欲飲冷水者是熱盛也以五苓散加寒水石膏滑石可也詳太陽上篇

太陽陰邪停飲

太陽陰邪有水氣傷寒無汗熱烘烘主證乾嘔欬微喘外發內散小青龍小便不利少腹滿下利除麻共入苓噎麻易附喘加杏渴加花粉減半平

註太陽陰邪有水氣謂太陽傷寒表不解發熱

無汗兼有乾嘔而欬微喘飲病之主證宜以小青龍湯外發寒邪內散寒飲則可愈也或小便不利少腹滿或下利或噎或喘或渴此飲病或有之證亦以小青龍湯主之小便不

利少腹滿是水停下焦大便下利是水走大
腸俱除麻黃共入茯苓專滲利也噎爲內寒
之甚以麻黃易附子散內寒也喘氣上逆加
杏仁以降逆也渴加花粉減去半夏以避燥
生津也詳太陽下篇

少陰陽邪停飲

少陰陽邪有停飲六七日反不得眠下利而渴欬
而嘔小便不利豬苓煎

註少陰陽邪有停飲謂少陰陽邪熱證兼有停

飲病也少陰病當欲寐至六七日反心煩不
得眠是少陰熱也下利而渴欬嘔小便不利
是水飲停也以豬苓湯去其熱而利其水可
也詳少陰篇

少陰陰邪停飲

少陰陰邪有水氣腹痛四肢重沉疼小便不利自
下利或欬或嘔真武平欬加乾薑辛味共小便若
利去茯苓嘔去附子生薑倍利去芍藥入乾寧

註少陰陰邪有水氣謂少陰陰寒兼有水氣病

也飲病主證謂腹痛四肢沉重疼痛大便自利小便不利宜真武湯溫中利水也飲病或有之證或欬或小便利或嘔或下利欬加生薑細辛五味子小便若利去茯苓嘔去附子倍加生薑利去芍藥入乾薑也

喘急短氣

喘息喝喝數張口短氣似喘不擡肩促難布息爲實證短不續息作虛觀內因飲病或痰熱外因陰陽表裏看直視神昏汗潤髮疎微肢厥命難全

註

喘息氣急喝喝而數張口擡肩欠肚者喘也短氣則似喘非喘而不張口擡肩也二證皆胸中氣病肺主氣故屬肺也無論喘急短氣若氣促壅塞不能布息爲有餘之實證若氣短空乏不能續息爲不足之虛證內因謂飲冷傷肺或因痰熱也外因謂形寒傷表表主皮毛肺之合也皮毛受邪其次及膚及肌及胸及腹入胃皆令病喘當審陰陽表裏從化主治可也喘急短氣兼直視神昏汗出潤髮

脈微四肢厥冷皆死候也與三陰寒證同見
是為陰喘宜四逆加杏仁五味子虛者倍加
人參與三陽熱證同見是為陽喘宜白虎葛
根黃芩黃連湯與太陽表證同見是為表喘
無汗者麻黃湯兼煩躁者大青龍湯有汗者
桂枝加厚朴杏子湯與陽明裏證同見是為
裏喘宜大承氣湯兼結胸者宜大陷胸丸若
兼水氣表實者小青龍湯表虛者及小便不
利均宜五苓散加葶藶子裏實者宜葶藶大

棗湯兼腹脇鞞痛者宜十棗湯裏寒者宜真
武湯若脈微細口鼻氣短喘乏而無陰陽表
裏證此氣虛喘也宜保元湯加五味子杏仁
若喘而唾痰稠黏喉間漉漉有聲此痰喘也
重者宜瓜蒂散礞石滾痰丸輕者二陳加苦
葶藶子蘓子之類也
心下悸

築築惕惕心動悸怔忡不自安飲多尿少為
停水厥冷汗後是虛寒

註心下築築惕惕怔怔忡忡謂悸病之狀也飲水多而小便少水停心下之悸也宜茯苓甘草湯或五苓散厥冷為寒宜真武湯汗後為虛宜小建中湯或不因汗後是虛之甚也宜炙甘草湯

戰振慄

戰身聳動慄心慄振雖聳動比戰輕故振責虛因無力慄戰相交邪正爭此證若生三法後虛其中外逆而成不逆因和而作解正勝邪却戰汗平

註戰謂身抖聳動也慄謂心內發慄也振亦聳

動比之於戰則無力也所以論中曰振振者皆責其虛也慄邪氣為之也戰正氣為之也邪正相交故爭也此證若生於汗吐下之後是虛其中外而致逆也若不致逆邪因以衰正因以和而作解則為正勝邪却戰慄汗出而平也

呃逆噦噫

呃逆今名噎古名不似噦噦胃裏聲噎聲格格連

聲作原夫臍下氣來衝頗類噯噫情自異均屬氣
逆治能同虛熱搗皮竹茹治二便不利利之寧氣
不歸原宜都氣寒虛丁萸附理中痞鞅下利生薑
瀉痞鞅噯氣代赭功

註今之名曰呃逆卽古之名曰噎也噎者氣噎
結有聲也世有以噦爲呃逆者蓋不知噦噦
之聲聲從胃裏出口不似噎之格格連聲氣
從臍下來自衝脈出口作聲也呃逆頗類噯
氣噯氣噯氣者因飽食太急比時作噯轉食

氣也噯氣者因過食傷食越時作噯食臭氣
也故曰情自異也但均屬氣逆爲病故曰治
能同也呃逆之病胃氣虛竭也兼熱者以搗
皮竹茹湯加柿蒂主之兼大便不利以三承
氣湯主之兼小便不利以二苓散湯主之兼
腎虛不能攝衝脈之氣歸原以都氣湯加牛
膝主之兼寒虛太陰手足溫以丁萸理中湯
主之少陰手足厥更加附子兼痞鞅下利以
生薑瀉心湯主之兼痞鞅噯氣以旋覆代赭

石湯主之

結胸

按之滿鞮不痛痞鞮而滿痛爲結胸大結從心至少腹小結心下按方疼熱微頭汗爲水結漱水不嘔血結名瘀衄未盡經適斷內實沉大審的攻抵當挑仁大小陷誤攻浮大命多傾不實浮滑小陷證藏結悉具躁煩凶

註傷寒下之太早則成痞鞮中風下之太早則成結胸均爲表邪乘虛入裏鞮滿按之而痛

爲結胸實邪也鞮滿按之不痛爲痞鞮虛邪也大結謂大結胸從心下至少腹鞮滿而痛手不可近者宜大陷胸湯攻之小結謂小結胸微結心下按之方痛不按不疼也宜小陷胸湯開之身有微熱頭自汗出兼有是證者爲水結胸也宜大陷胸丸攻之漱水不欲嘔兼有是證者爲血結胸也血瘀不成衄解或衄未盡或婦人經來適斷皆能成之宜抵當丸或挑仁承氣湯攻之內實證實可攻也沉

大脈實可攻也審其的當則用抵當桃仁承
氣大陷胸湯丸以攻之審若不內實脈浮滑
或脈浮大是未的也乃小陷胸證不可攻也
誤攻之定然凶也藏結謂狀如結胸舌胎白
滑脈浮而細也悉具謂結胸通腹兩脇皆鞅
滿痛也此證加之煩躁凶死可知

痞鞅

陽證痞鞅為熱痞大黃黃連瀉心寧汗出惡寒寒
熱痞附子瀉心兩收功誤下少陽發熱嘔痞滿半

夏瀉心能虛熱水氣痞下利心煩乾嘔腹雷鳴虛
熱水氣生薑瀉痞急氣逆甘草靈桂枝表解乃攻
痞五苓煩渴利尿通

註傷寒下早則成痞鞅中風下早則成結胸此

其常也然論中中風下早未嘗無痞鞅傷寒

下早亦有結胸大抵從虛化者多為痞鞅從

實化者多結胸也陽證心下痞鞅為熱痞宜

大黃黃連瀉心湯若陽證汗出惡寒為寒熱

痞宜附子瀉心湯誤下少陽發熱而嘔心下

痞滿爲嘔逆痞宜半夏瀉心湯陽證誤下心下痞鞅下利心煩乾嘔腹中雷鳴脇下有水氣或小便不利爲虛熱水氣之痞宜生薑瀉心湯若有是證脇下無水氣其痞急益甚爲虛熱客氣上逆之痞宜甘草瀉心湯凡有痞者有無汗惡寒之表宜桂枝湯表解已乃可以大黃黃連瀉心湯攻痞也若有痞者與瀉心湯痞不解其人煩渴小便不利先以五苓散小便利後乃可與諸瀉心湯治痞也

發黃

濕熱發黃頭汗出小便不利渴陽明素有寒濕發汗後黃從陰化太陰經陽色鮮明陰色暗太陽血蓄併狂生表實麻翹赤小豆茵陳裏實梔子清陰黃茵陳四逆主便溏尿秘茵五苓環口鰲黑柔汗死體若烟薰陽絕徵

註陽明病應徧身有汗謂之熱越今頭汗出身無汗是熱不得越也渴而引飲小便不利是停水也熱與濕瘀從土而化外薄肌肉謂之

濕熱發黃也或其人素有寒濕爲表邪遏鬱
或已成黃又經發汗傳入太陰從陰而化謂
之濕寒發黃也陽明屬陽故其色明亮太陰
屬陰故其色晦暗也太陽蓄血亦有發黃多
與狂病併生法當從蓄血治也表實無汗發
黃者宜麻黃連翹赤小豆湯汗之裏實不便
者宜茵陳蒿湯下之無表裏證熱盛者宜梔
子蘘皮湯清之陰證發黃者宜茵陳四逆湯
溫之若大便溏小便秘發黃者宜茵陳五苓

散利之環口鰲黑柔汗者陰黃死證也柔汗
謂冷汗也身體枯燥如烟薰者陽黃死證也

疹斑

傷寒疹斑失汗下時氣初感卽其然表邪覆鬱營
衛分外泛皮脈痧疹斑痧白疹紅如膚粟斑紅如
豆片連連紅輕赤重黑多死淡紅稀暗是陰寒未
透升麻消毒治熱盛三黃石膏煎已透青黛消斑
飲雙解痧疹法同前

註傷寒發斑疹痧皆因汗下失宜外邪覆鬱內

熱泛出而成也惟時氣傳染感而卽出亦由
疫之爲病烈而速也發於衛分則爲痧衛主
氣故色白如膚粟也發於營分則爲疹斑營
主血故色紅膚淺爲疹深重爲斑斑形如豆
甚則成片連屬斑疹之色紅者輕赤者重黑
者死此以熱之深淺驗死生也若其色淡紅
而稀暗者皆因邪在三陽已成斑疹入裏邪
從陰化或過服冷藥所致是爲陰斑陰痧陰
疹法當從陰寒主治也斑出未透表熱輕者

宜升麻葛根湯合消毒犀角飲治之表熱重
者宜三黃石膏湯發之已透用青黛消斑飲
加減清之痧疹初起表裏不清用雙解散先
通表裏餘法同前治之可也

衄血

陽明衄血熱在裏太陽衄血熱瘀經太陽頭痛目
瞑兆陽明漱水不嚥徵衄後身涼知作解不解升
麻犀角清未衄表實麻黃汗裏熱犀角芩連同
註陽明衄血熱在裏也太陽衄血熱瘀經也太

陽失汗則有頭痛目瞋之兆陽明失下則有
漱水不欲嚥之徵衄血之後身涼脈靜知作
解也若仍不解知衄未盡熱留於營也無汗
表熱宜升麻葛根合犀角地黃湯清解之欲
作衄未衄者表實宜麻黃湯汗之裏熱宜犀
角地黃湯加芩連清之若表實裏熱者則又
當合二方兩解之

吐血

傷寒吐血多因逆下厥上竭少陰經三陽熱盛宜

清解血瘀胸滿痛當攻暴吐腐臭內潰死過多血
脫面無紅犀角挑仁宜揀用救脫聖愈及養榮

註

傷寒吐血皆因失汗失下火逆以致邪熱熾

盛沸騰經血故也若血從口鼻耳目而出小

便難此為強發少陰汗名曰下厥上竭為難

治也三陽熱盛吐血宜升麻葛根合犀角地

黃湯熱甚加芩連清解可也若血瘀則胸滿

或痛當以挑仁承氣合犀角地黃湯攻之若

暴吐腐臭之血名曰內潰內潰者死若吐血

過多面脣無紅色名曰血脫救脫輕者以聖
愈湯重者以人參養榮湯

大小便膿血

熱在膀胱小便血八正導赤利之佳熱瘀裏急下
膿血黃連白頭與桃花

註陽經之熱下注膀胱傷其營分熱少血多瘀

成血蓄熱多血少熱迫血行血不得蓄而走
下竅故尿血也以八正散導赤散利而清之
陰經之熱轉迫陽明傷其營分瘀則血蓄喜

忘如狂不蓄則便血熱腐則便膿便膿熱鬱
裏急下重所必然也輕者宜黃連阿膠湯重
者白頭翁湯清之滑脫者桃花湯瀉之可也
頤毒

傷寒發頤耳下腫失於汗下此毒生高腫焮紅痛
為順反此神昏命必坑毒伏未發脈亦隱冷汗淋
瀉肢若冰煩渴不便指甲紫頗似三陰了了輕

註傷寒頤毒皆因汗下失宜毒熱挾少陽相火
上攻而成也若其人陽氣素盛則高腫焮紅

疼痛易於成膿故爲順也宜連翹敗毒散散
之或其人陽氣素虛或服冷藥過多遏鬱毒
熱伏藏在裏內攻神昏外毒漫腫肉色不變
不疼木硬則命必危也毒伏未發之前往往
似三陰亡陽之證脈隱不見冷汗淋漓肢冷
若冰但身輕目睛了了煩渴不大便指甲紅
紫爲異此毒發始臨治不可忽也

狐惑

古名狐惑近名疳疔蝕肛陰惑唇咽病後餘毒斑

疹後癍疾利後也同然而皆赤白黑不一目不能
閉喜貪眠潮熱聲啞腐穢氣能食堪藥治多全

註

狐惑牙疳下疳等瘡之古名也近時惟以疳
呼之下疳卽狐也蝕爛肛陰牙疳卽惑也蝕
咽腐齩脫牙穿腮破唇毒因傷寒病後餘毒
與濕蟲之爲害也或生斑疹之後或生癍疾
下利之後其爲患亦同也其證則面色目皆
或赤或白或黑時時不一喜睡目不能閉潮
熱聲啞腐爛之處穢氣熏人若胃壯能食堪

受攻病重藥或病之勢緩治多全也

百合

百合百脈合一病如寒似熱藥無靈飲食起居皆忽忽如神若鬼附其形脈數溺時輒頭痛溺時不痛浙浙風溺時快然但頭眩六四二十病方寧

註百合病者謂傷寒過期留連不解不分經絡

百脈悉合為一病也如寒似熱諸藥無靈欲飲不能飲欲食不能食欲臥不能臥欲行不能行精神忽忽如神若鬼附其形體而莫知

所適從也如脈數溺尿時輒頭痛者六十日乃愈若溺尿時頭不痛惟浙浙然惡風寒者四十日乃愈若溺時快然但頭眩者二十日乃愈故曰六四二十病方寧也

熱入血室

婦人傷寒同一治胎產經來熱入室晝日明了夜譫妄小柴生地牡丹皮無汗加麻有汗桂汗後不解再加枝寒熱如瘧加麻桂中寒薑附不須疑渴熱白虎花粉葛瘀血桃仁承氣俱產後胎前雖多

證不外陰陽表裏醫

註婦人傷寒與男子治法同也惟產後經來邪熱乘虛而入血室另有治法熱入血室之證晝日明了夜則譫語妄見鬼狀宜小柴胡湯加生地丹皮若無汗則爲表實如麻黃汗之有汗則爲表虛加桂枝解之若有發熱惡寒之表已經發汗雖無汗不加麻黃再加桂枝以解之不可復用麻黃也若有如瘧之寒熱加麻黃桂枝兩解之若厥而下利則爲中寒

去黃芩加薑附不須疑也若發熱煩渴則爲裏熱去半夏合白虎或加花粉葛根胸脇少腹或滿鞞或作痛則爲瘀血宜合桃仁承氣湯攻之產後胎前雖有多證不能盡述總不外陰陽表裏之治在臨證者以意消息之耳
食復勞復

新愈藏府皆不足營衛腸胃未通和多食過勞生復熱枳實梔子大黃差浮汗沉下小柴解燥嘔竹葉石膏合氣虛補中益氣主陰虧六味倍參多

註 新愈之後藏府氣血皆不足營衛未通腸胃未和惟宜白粥靜養若過食胃弱難消因復煩熱名曰食復若過勞役復生熱煩名曰勞復勞復者宜枳實梔子豉湯汗之食復者宜枳實梔子豉加大黃湯下之鯀浮有表者宜枳實梔子豉湯以汗解之鯀沉有裏者宜枳實梔子豉加大黃湯以下解之若無表裏證者宜小柴胡湯以和解之口燥煩渴喜嘔者宜竹葉石膏湯主之若內傷氣虛勞復者宜

補中益氣湯主之若犯內事陰虧者宜六味生乾地黃湯氣少者倍加人參湯主之
房勞復陰陽易

房勞復與陰陽易二病情異證則同病後犯色復自病病傳不病易之名男女俱主燒裨散少腹急痛引陰中身重少氣頭眩暈拘攣熱氣上腫胸

註

男女新愈交接因而復病名曰房勞復男女新愈交接病男傳不病之女病女傳不病之男名曰陰陽易即交易之義也犯是病者男

以女之視襦襦女以男之視襦襦燒灰白湯或酒
日三服之則愈少腹急痛牽引陰中身重少
氣頭目眩暈四肢拘攣熱氣衝胸是其證也

[Faint bleed-through text from the reverse side of the page, including characters like 氣, 頭, 目, 眩, 暈, 四, 肢, 拘, 攣, 熱, 氣, 衝, 胸, 是, 其, 證, 也.]